

四庫全書

史部

欽定四庫全書

史部

欽定續文獻通考卷八十七

給事中_臣陳化龍覆勘

總校官內閣中書_臣孫溶

欽定四庫全書

欽定續文獻通考卷八十七

王禮考

臣等謹按馬端臨作王禮考蓋本朱子儀禮經傳通解所謂王朝之禮也自朝儀而下凡巡狩田獵冠冕服章圭璧符璽車旗鹵簿以及國恤山陵分爲八類而車服之制后妃百官各以類從自遠古迄於宋寧宗以前既詳且備矣理度之世偏安未

造未遑講求典物今考遼金元三史遼金創業東方元則肇興朔漠其開國之初朝會燕饗之禮各從本俗自遼太宗克晉金太宗滅遼元世祖混一區宇於是議禮制度度數文物聲明燦焉大備而先世忠質之風亦寢失遺意至於改易衣冠盡從漢禮三朝末季如一轍焉伏讀

御批通鑑輯覽曰夏收殷昀本不相襲元魏變衣冠不數傳而失遼金元亦然觀此可為炯鑒復於

御製皇朝禮器圖式序文及

全韻詩中再三申警三季之不可法而可戒者如此若明
太祖儉德開基其創造儀物因革損益力懲時弊
永樂嘉靖之間往往有所增改大約一代之制由
簡樸而漸趨於文亦風會使然也今從各史紀傳
志表依類分輯又按端臨帝系考於太皇太后皇
太后門附載上尊號冊寶儀注於后妃門附載天
子納后冊后儀皇太子納妃儀於皇太子皇子門

附載冊立皇太子儀於公主門附載公主受冊公主下嫁儀王圻續考皆移入王禮蓋以朝家典禮所在附入帝系於體例無當也茲仍其例載於朝儀之後又王圻考於山陵後增諡法一門今帝后尊諡已載於山陵卷中其通諡可無庸贅述故不具錄云

朝儀

宋孝宗乾道二年九月詔定四參日分起居班次

時閣門奏垂拱殿四參

四參官謂宰執侍從武臣正任文臣卿監員郎監察御史

以皇帝坐先讀奏目知閣以下次御帶環衛官以下

次忠佐殿前都指揮使以下次殿前司員僚次皇太

子次行門以上逐班並常起居次樞密學士待制樞

密都承旨以下知閣并祇應武功大夫以下通班常

起居次親王次馬步軍都指揮使次使相次馬步軍

員僚以上逐班並常起居次殿中侍御史入側宣大

起居訖歸侍立位次宰執以下並兩省官文武百官

入相向立定通班面北立大起居訖

凡常起居兩拜
大起居七拜

三省升殿侍立次兩省官出次殿中侍御史對揖出
三省樞密院奏事次引見謝辭次引臣僚奏事訖皇
帝起詔今後遇四參日分起居班次可移殿中侍御
史及宰執以下百官班今次樞密以下班起居却令
親王并殿前都指揮使以下殿前司員僚逐班於宰
執以下班後起居餘並從之

淳熙七年九月詔自今垂拱殿日參宰臣特免宣名

周密齊東野語曰時帝宣諭宰執云今後常朝宰
臣免宣名他朝會則否且云朕記得老蘇議論贊
儀之臣呼名如胥吏非禮貌之意也

寧宗嘉定十二年正月復常朝後殿四參禮

臣僚奏竊見皇帝御正殿或御後殿固可間舉四參
官亦有定日近者每日改常朝為後殿四參之禮亦
多不講正殿後殿四參間免陛下臨朝之日固未嘗
輟而外廷不知聖意或謂姑從簡便非所以肅百執

事也常朝之禮止於從臣後殿之儀從臣不與四參
止及卿郎而乃累月僅或一舉咫尺天威踈簡至此
非所以尊君上而勵百辟也伏願嚴常朝後殿四參
之禮起羣下肅謹之心彰明時勵精之治從之

沈括筆談曰唐制兩省供奉官東西對立謂之峨
眉班國初供奉班於百官前橫立王溥罷相為東
宮一品班在供奉班之後遂令供奉班依舊分立
慶厯中賈安公為中丞以東西班對拜為非禮復

令橫行至今初叙班分立百官班定乃轉班橫行
參罷復分立百官班退乃出參用舊制也

陸游老學菴筆記曰故相入朝以經筵或內祠奉
朝請班退亦與從官同捲班而出三公無班若不
秉政惟立使相班與貴戚諸人雜立又舊制朝參
拜舞而已政和以後增以喏然紹興中余造朝已
不復喏矣淳熙末還朝則迎駕起居閣門亦喝唱
喏然未嘗出聲也又紹興中朝參止磬折遂拜今

閣門習儀先以笏叩額拜拜皆然謂之瞻笏亦不知起於何年也

理宗寶慶二年十一月丙辰始御紫宸殿丙子日南至

詣慈明殿

朝皇太后也

紹定三年十二月詔免明年元會

禮

臣等謹按王圻續通考載寶慶三年天基節羣臣上壽於垂拱紫宸殿紹定四年十二月詔正旦大朝會權免端平二年十一月日南至羣臣朝賀紀

與志皆不載

遼太祖神冊元年二月丙戌朔帝在龍化州德呼勒部
額爾奇木耶律赫魯等率百僚請上尊號丙申羣臣及
諸屬國築壇州東上尊號建元神冊

太宗天顯三年九月有司請以帝生日為天授節皇太
后生日為永寧節十月癸卯朔永寧節率羣臣上壽於
延和宮甲子天授節御五鸞殿受羣臣及諸國使賀

臣等謹按帝紀太祖天顯元年帝即位有司請改

元不許故仍稱天顯凡十二年

會同元年十一月御宣政殿受晉使劉煦等冊上尊號
三年正月回鶻使乞觀諸國使朝見禮從之四月帝
至燕御元和殿行入閣禮五月庚午以端午宴羣臣及
諸國使命回鶻燧煌二使作本俗舞俾諸使觀之 四
年十一月以永寧天授二節及正旦重午冬至臘並受
賀著為令 大同元年正月朔備法駕入汴御崇元殿
受百官賀

臣等謹按歐陽修五代史晉開運三年

遼之會同九年晉

出帝降遼太宗將至京師有司請以法駕奉迎曰

吾躬擐甲胄以定中原太常之儀不暇顧也止而

不用四年正月丁亥朔旦被甲衣貂裘帽自封邱

門入晉宮夕出宿於赤岡癸巳入居晉宮甲午視

朝於廣政殿乙未被中國冠服百官常參起居如

晉儀二月丁巳朔金吾六軍殿中省仗太常樂舞

陳於廷冠通天冠服絳紗袍執大珪以視朝大赦

改晉國為大遼國開運四年為會同十年

遼史云
改大同

元年

三月丙戌朔服鞞袍御崇元殿百官入閣大悅

與紀稱正月有異又考遼史儀衛志帝受文武百
官賀於崇元殿自是日以為常蓋即五代史所謂
常參起居非必日日朝賀也

穆宗應歷元年十一月詔朝會依嗣聖皇帝故事用漢

禮

嗣聖皇帝太
宗尊號也

十四年八月戊申以生日值天赦不

受賀十七年五月壬辰罷重五宴

以北府宰相蕭
海瓚薨故也八

月辛酉生日不受賀

以政事令安已
達病亟故也

聖宗統和七年七月御含涼殿視朝

臣等謹按帝紀七年二月壬子朔帝御元和殿受
百官賀考元和殿在燕京時帝南伐破宋易州還
次南京御殿受賀蓋賀破宋非賀正也亦猶前此
五年正月之還南京御元和殿大賚將士耳詳巡

狩門

興宗重熙元年正月朔皇太后御正殿受帝與羣臣朝

時皇太后聽政
帝不親庶務

九年正月朔帝進酒於皇太后宮御

正殿

先是三年五月皇太后還政於帝
躬守慶陵八年七月迎還上京

道宗太康三年閏十二月丙寅豫行正旦禮 六年十

二月丁亥豫行正旦禮 大安四年閏十二月癸卯朔

豫行正旦禮

臣等謹按道宗朝豫行正旦禮者三考其時太康

四年正月庚辰如春水六年十二月戊子如混同

江大安四年閏十二月丙午如混同殆以已納之

故不及待元會也

壽隆七年正月力疾御清風殿受百官及諸國使賀

天祚帝乾統十年正月豫行立春禮

是日如鴨子河

正旦朝賀儀

臣僚并諸國使昧爽入朝奏班齊皇帝升殿坐契丹
舍人殿上通訖引契丹臣僚東洞門入引漢人臣僚
并諸國使西洞門入合班舞蹈五拜

凡五拜拜興再
拜興跪搢笏三

舞蹈三叩頭出笏就拜興拜興
再拜興其就拜亦曰俯伏興

鞠躬平身引親王東

階上殿欄內褥位俯伏跪自通全銜臣某等祝壽訖

伏興退引東階下殿復位舞蹈五拜畢鞠躬宣徽使

殿上鞠躬奏臣宣答稱有敕班首以下聽制訖再拜

鞠躬宣徽傳宣云履新之慶與公等同之舍人贊謝

宣諭拜舞蹈五拜贊各祇候分班引出引班首西階

上殿奏表目訖教坊起居賀十二拜畢贊各祇候引

契丹漢人臣僚并諸國使東西洞門入合班再拜贊

進酒引親王東階上殿就欄內褥位搢笏執臺琖進酒訖退復褥位置臺琖出笏少前俯伏自通全銜臣某等謹進千萬歲壽酒俯伏興退復褥位與殿下臣僚皆再拜鞠躬俟宣赦使殿上鞠躬奏臣宣答稱有制親王以下再拜如初儀傳宣云飲公等壽酒與公等內外同慶舍人贊謝宣諭如初贊各祇候親王搢笏執臺琖殿下臣僚分班皇帝飲酒教坊奏樂殿上下臣僚皆拜稱萬歲贊各祇候樂止教坊再拜皇帝

卒飲親王進受璣復稱位置臺璣出笏揖臣僚合班
引親王東階下殿復位鞠躬再拜贊各祗候分班引
出皇帝起詣皇太后殿臣僚并諸國使皆從皇太后
升殿皇帝東方側坐引契丹漢人臣僚并諸國使兩
洞門入合班稱賀進酒皆如皇帝之儀畢引出教坊
入起居進酒亦如之皇太后宣答稱聖旨契丹班謝
宣宴上殿就位立漢人臣僚并諸國使東洞門入丹
墀東方面西鞠躬舍人鞠躬通文武百僚宰臣某以

下謝宣宴再拜出班致詞訖退復位舞蹈五拜贊各
上殿祇候引宰臣以下並諸國使副方袞朶殿臣僚
西階上殿就位立不應坐臣僚並於西洞門出二人
監琰教坊再拜贊各上階下殿謝宴如皇太后生辰
儀

冬至朝賀儀

臣僚班齊如正旦儀皇帝皇后拜日臣僚陪位再拜
皇帝皇后升殿坐契丹舍人通臣僚入合班親王祝

壽宣答皆如正旦之儀謝訖舞蹈五拜鞠躬出班奏
聖躬萬福復位再拜鞠躬班首出班俛伏跪祝壽訖
俛伏興舞蹈五拜鞠躬贊各祇候分班不出合班御
牀入再拜鞠躬贊進酒臣僚平身引親王左階上殿
就欄內褥位搢笏執臺琖進酒皇帝皇后受琖訖退
就褥位置臺琖出笏俛伏跪少前自通全銜臣某等
謹進千萬歲壽酒俛伏興退復褥位再拜鞠躬殿下
臣僚皆再拜鞠躬宣答如正旦儀親王搢笏執臺琖

分班皇帝皇后飲酒奏樂殿上下臣僚皆拜稱萬歲
壽樂止教坊再拜臣僚合班親王進受琖至禱位置
臺琖出笏引左階下殿出御牀親王復丹墀位再拜
鞠躬贊祇候分班引出班首右階上殿奏表目進奉
諸道進奉教坊進奉過訖贊進奉收班首舞蹈五拜
鞠躬贊各祇候班首出臣僚復入合班謝舞蹈五拜
鞠躬贊各祇候分班引出聲警皇帝皇后起赴北殿
皇太后與皇帝皇后於御容殿率臣僚再拜皇太后

上香皆再拜贊各祇候可矮墩以上上殿皇太后三
進御容酒陪位皆拜皇太后升殿坐皇帝就露臺上
褥位親王押北南臣僚班丹墀內立皇帝再拜臣僚
皆拜鞠躬皇帝欄內跪祝皇太后壽訖復位再拜凡
拜皆稱萬歲贊各祇候臣僚不出皇帝皇后側坐親
王進酒臣僚陪拜皇太后宣答皆如正旦之儀臣僚
分班不出班首右階上殿奏表目合班謝宣宴上殿
就位如儀御牀入皇帝進皇太后酒如初各就坐行

酒宣飲盡如皇太后生辰之儀皇后進酒如皇帝之儀三進酒行茶教坊致語行教膳大饌七進酒曲破臣僚起御牀出謝宴皆如皇太后生辰儀

常朝起居儀

昧爽臣僚朝服入朝各依幕次內侍奏班齊先引京官班於三門外當直舍人放起居再拜各祇候依次兩府以下文武官於丹墀內面殿立豎班諸司并供奉官於東西道外相向立定當直閣使副贊放起居

再拜各祇候退還幕次公服帝升殿坐兩府并京官
丹墀內聲喏各祇候教坊司同北班起居畢奏事

燕京

就嘉寧殿西京就同文殿朝
服幞頭袍笏公服紫衫帽也

正座儀

皇帝升殿座警聲絕契丹漢人殿前班畢各依位侍
立次教坊班畢捲退京官班入拜畢揖於右橫街西
依位班立次武班入拜畢依位立文班入拜畢依位
立北班入起居畢於左橫街東序班立次兩府班入

鞠躬通宰臣其官以下起居拜畢引上殿奏事

以上六班

起居並七拜內有不帶節度使班首止通名亦七拜
搃班與常朝同直院有旨入文班留守司三司統軍
司制置司謂之京官都部署司官使副官使都承以
下今史北面主事以下隨駕諸司為武官館閣大理
寺堂後以下御史臺隨駕開員令
史司天臺翰林醫官院為文官

皇帝受冊儀

前期一日尚舍奉御設幄於正殿北牖下南面設御
座奉禮郎設官僚客使幕次於東西朝堂大樂令設
宮縣於殿庭舉麾位在殿第二重西階上東向乘黃

令陳車輅尚輦奉御陳輿輦尚舍奉御設解劍席於東西階設文官六品以上位橫街南東方西向武官五品以上位橫街南西方東向皆北上重行每等異位將士各勒所部六軍仗屯諸門金吾仗黃麾仗陳於殿庭至日押冊官引冊自西便門入置冊案西階上通事舍人引侍從班入就位侍中東階下解劍履上殿欄外俛伏跪奏中嚴下殿劍履復位立閣使西階上殿欄外跪請木契面殿鞠躬奏奉敕喚仗殿中

監少監殿中丞等押金吾四色仗入位臣僚後協律郎入就舉麾位符寶郎詣閣奉迎通事舍人引文官四品至六品武官三品至五品就門外位皇帝御輦至宣德門宣徽使押內諸司班起居引皇帝至閣服袞冕侍中東階下解劍履上殿版奏外辦太常博士引太常卿太常卿引帝內諸司出協律郎舉麾大樂令令撞黃鍾之鍾左五鍾皆應工人鼓祝樂作皇帝即御座宣徽使贊扇合樂止贊簾捲扇開符寶郎奉

寶進左右金吾報平安通事舍人引文官三品武官
二品以上入門樂作就相向位畢樂止通事舍人引
侍從班南班文官三品武官二品以上合班北向東
班西上西班東上起居七拜分班各復位通事舍人
引押冊官押冊自西階下至丹墀當殿置香案冊案
置冊訖樂作就位樂止捧冊官近後東西相對立舍
人引侍從班并南班合班北向如初贊再拜在位者
皆再拜舞蹈五拜分班各復位如初捧冊官就西階

下解劍席解劍履捧冊西階上殿樂作置冊御座前
東西立北向捧冊官西牖下立北上樂止讀冊官出
班當殿立贊再拜三呼萬歲就西階下解劍席解劍
履西階上殿欄內立當御座前侍中取冊捧冊官捧
冊匣至讀冊官前跪相對捧冊讀冊官俛伏跪讀訖
俛伏興捧冊官跪左膝以冊授侍中侍中受冊以冊
授執事者降自西階劍履訖復當殿位贊再拜三呼
萬歲復分班位舍人引侍從班南班合班北向如初

贊拜在位者皆拜舞蹈鞠躬如初通事舍人引班首
西階下解劍履上殿樂作就欄內位樂止俛伏跪通
全銜臣某等致詞稱賀訖俛伏興降西階下帶劍納
舄樂作復位樂止贊拜在位者皆再拜舞蹈五拜鞠
躬侍中臨軒西向稱有制皆再拜侍中宣答訖贊皆
再拜舞蹈五拜分班各復位三品以上出樂作出門
畢樂止侍中當御座俛伏跪通全銜奏禮畢俛伏興
退東階下殿帶劍納履復位宣徽使贊扇合下簾太

常博士太常卿引皇帝起樂作至闕樂止舍人引文
官四品武官三品以下出門外分班立次引侍從班
出次兵部吏部出次金吾出次起居郎舍人出次殿
中監少監押金吾細仗出仍位臣僚後次東西上闕
門使於丹墀內鞠躬奏衛內無事捲班出闕門使丹
墀內鞠躬揖奏敕放仗出門外文武班中間立喚承
受官承受官聲喏至闕門使後鞠躬揖闕門使鞠躬
稱奉敕放仗承受聲喏鞠躬揖平身立引聲奉敕放

仗輦絕趨退文武合班再拜舍人一員攝詞令官殿
前鞠躬揖稱奉敕放黃麾仗出放金吾仗亦如之翌

日文武臣僚入問聖躬

太平元年行此儀大略遵唐
晉舊儀又有上契丹冊儀以

阻午可汗行柴冊禮合唐禮雜就之又有
上漢冊儀與此儀大同小異加以上寶儀

皇帝生辰朝賀儀

臣僚國使班齊皇帝升殿坐臣僚使副入合班稱賀
合班出皆如皇太后生辰儀中書令北大王奏諸道
進奉表目教坊起居七拜臣僚東西門入合班再拜

贊進酒班首上殿進酒宣徽使宣答羣臣謝宣諭分
班奏樂皇帝卒飲合班班首下殿分班出皆如正旦
之儀進奉皆如皇太后生辰儀皇帝詣皇太后殿近
上皇族外戚大臣並從奉迎太后即皇帝殿坐皇太
后御小輦皇帝輦側步從臣僚分行序引宣徽諸使
閣門攢隊前引教坊動樂控鶴官起居四拜引駕臣
僚並於山樓南方立候皇太后入閣揖使副并臣僚
入幕次皇太后升殿坐皇帝東方側坐引契丹漢人

臣僚使副兩洞門入合班起居舞蹈五拜贊各祇候
面殿立皇帝降御座殿上立進皇太后生辰物過畢
皇帝殿上再拜殿上下臣僚皆拜皇帝升御座引臣
僚分班出契丹臣僚入謝宣宴漢人臣僚使副入通
名謝宣宴上殿就位不應坐臣僚出從人入皆如儀
御牀入皇帝初進皇太后酒皇太后賜皇帝酒皆如
皇太后生辰儀贊各就坐行酒宣飲盡就位謝如儀
殿上一進酒畢從人入就位如儀親王進酒行餅茶

教坊致語如儀行茶行穀膳如儀七進酒使相樂曲
終從人起曲破臣僚使副起餘如正旦儀

皇太后生辰朝賀儀

至日臣僚入朝國使至幕班齊如常儀皇太后升殿
坐皇帝東面側坐契丹舍人殿上通名契丹漢人臣
僚宋使副綴翰林學士班東西兩洞門入合班稱賀
班首上殿祝壽分班引出皆如正旦之儀教坊起居
七拜契丹漢人臣僚入進酒皆如正旦之儀惟宣答

稱聖旨皇帝降御座進奉皇太后生辰禮物過畢皇
帝殿上再拜殿下臣僚皆再拜皇帝升御座引臣僚
分班出引中書令北大王西階上殿奏契丹臣僚進
奉次漢人臣僚并諸道進奉控鶴官置擔牀起居四
拜畢引進使鞠躬通文武百僚某官某以下高麗夏
國諸道進奉宣徽使殿上贊進奉各付所司控鶴官
聲喏擔牀過畢契丹漢人臣僚以次謝五拜贊各祇
候引出教坊諸道進奉使謝亦如之契丹臣僚謝宣

宴引上殿就位立漢人臣僚并宋使副東洞門入面
西謝宣宴如正旦儀贊各上殿祇候臣僚使副上殿
就位立亦如之監瓊教坊上殿從人入東廊立皆如
之御牀入皇帝初進酒臣僚就位陪拜皇太后飲酒
殿上應坐侍立臣僚皆拜稱萬歲贊各祇候立皇太
后卒飲手賜皇帝酒皇帝跪卒飲退就褥位再拜臣
僚皆陪拜若皇帝親賜使相臣僚宋使副酒皆立飲
皇帝升坐贊應坐臣僚并使副皆拜稱萬歲贊各就

坐行方裊朶殿臣僚酒如正旦儀一進酒兩廊從人
拜稱萬歲各就坐親王進酒如正旦儀若皇太后手
賜親王酒跪飲訖退露臺上五拜贊祇候殿上三進
酒行餅茶訖教坊跪致語揖臣僚使副廊下從人皆
立口號絕贊拜亦如之行茶行穀膳皆如之大饌入
行粥盃殿上七進酒使相臣僚樂曲終揖廊下從人
起拜稱萬歲贊各好去承受官引兩門出曲破揖臣
僚使副起鞠躬贊拜皆拜稱萬歲贊各祇候引臣僚

使副下殿契丹臣僚謝宴畢出漢人臣僚使副舞蹈
五拜畢贊各好去出洞門畢報閣門無事皇太后皇

帝起

皇后生辰朝賀儀

臣僚味爽朝皇帝皇后大帳前拜日契丹漢人臣僚
陪拜皇帝升殿坐皇后再拜臣僚殿下合班陪拜皇
帝賜皇后生辰禮物皇后殿上謝再拜臣僚皆拜契
丹舍人通名契丹漢人臣僚以次入賀瑗入舍人贊

舞蹈五拜起居不表聖躬萬福贊再拜班首上殿拜
跪自通全銜祝壽訖引下殿復位鞠躬贊舞蹈五拜
贊各祗候引宰臣一員上殿奏百僚諸道進表目教
坊起居七拜不賀控鶴官起居四拜諸道押衙附奏
起居賜宴共八拜契丹漢人合班進壽酒舞蹈五拜
引大臣一員上殿欄外褥位搢笏執臺琖進酒皇帝
皇后受琖退復褥位授臺出笏欄內拜跪自通全銜
祝壽臣等謹進千萬歲壽酒訖引下殿復位舞蹈五

拜鞠躬宣徽使奏宣答如儀引上殿措筭執臺琰皇
帝皇后飲殿下臣僚分班教坊奏樂皆拜稱萬歲卒
飲皇帝皇后授琰引下殿舞蹈五拜贊各祇候引出
臣僚進奉如儀宣宴如儀教坊監琰臣僚上殿祇候
如儀皇后進皇帝酒殿上贊拜侍臣僚皆拜皇帝受
琰皆拜皇后坐契丹舍人漢人閤使殿上贊拜皆拜
稱萬歲贊各就坐大臣進皇帝皇后酒行酒如儀酒
三行行殺行膳又進皇帝皇后酒酒再行大饌入行

粥教坊致語臣僚皆起立口號絕贊拜稱萬歲引下
殿謝宴引出皆如常儀

拜表儀

其日先於東上閣門陳設壇位分引南北臣僚諸國
使副於壇位合班通事舍人二人舁表案置班首前
揖鞠躬再拜平身中書舍人立案側班首跪搢笏興
捧表跪左膝以表授中書舍人出笏就拜興再拜中
書舍人復置表案上通事舍人舁表案於東上閣門

入捲班分引出禮畢

元日皇帝不御座行此儀
餘應上表有故皆倣此

臣等謹按馬端臨考不載上尊號及聖節上壽諸儀然此固朝儀也故各從正史增入若遼史禮志尚有賀祥瑞賀平難臣僚接見車駕還京宰相中謝及勣箭立春重午重九再生并諸國使入見朝辭賜宴等儀特一時之制不足為典要故俱闕之

金熙宗天眷十三年十二月始定齊高麗夏朝賀賜宴朝辭儀 十四年正月朔朝太皇太后於兩宮 十五

年正月朔朝太皇太后於明德宮

臣等謹按金史紀傳天眷十三年正月熙宗即位
八月詔齊國與本朝文移署年仍用天眷時太祖
欽憲皇后太宗欽仁皇后並為太皇太后欽憲居
慶元宮欽仁居明德宮十四年正旦帝朝兩宮然
後御乾元殿受羣臣賀明年帝朝於明德宮然後
御殿受賀自是歲以為常如天眷元年正月朔及
是年九月戊戌日皇統元年九月戊申日至自燕

京皆朝皇太后是也

皇統三年正月朔以皇太子故不御正殿羣臣詣便殿稱賀宋高麗夏使詣皇極殿遥賀乙巳萬壽節如正旦儀

臣等謹按禮志載熙宗時夏使入見改為大起居定制以宋使列於三品班高麗夏列於五品班皇統二年六月定臣使辭見臣僚服色拜數止從常朝起居三國使班品如舊俟殿前班及臣僚小起

居引宰執升殿餘臣分班畢乃令行入見及朝辭之禮凡入見則宋使先禮畢夏使入禮畢而高麗使入其朝辭則夏使先禮畢而高麗使入禮畢而宋使入夏高麗朝辭之賜則遣使就賜於會同館惟宋使則庭授六年詔外國使初見朝辭則於左掖門出入朝賀賜宴則由應天門東偏門出入焉

海陵正隆元年三月朔始定職事官朝參等格仍罷兵

衛

世宗大定元年十二月丁巳帝至中都己未御貞元殿
受羣臣朝 二年正月朔以日食不視朝辛未御太和
殿宴百官宗戚命婦賜賚有差 二十八年三月丁酉
朔萬春節御慶和殿受羣臣朝復宴於神龍殿諸王公
主以次捧觴上壽

章宗明昌元年十二月丙午詔有司正旦可先賀隆慶

宮然後進酒

太后宮先名仁壽後更名隆慶

二年五月敕自今四日

一奏事仍免朝十一月敕提刑司官自今每十五日一

朝 承安元年七月敕今後高麗夏使入見敷奏令新設各國通事具公服與閣門使上殿監聽 四年二月

諭有司自三月一日為始每旬三品至五品官各一人

轉對六品亦以次對臺諫勿與有應奏事與轉對官相

見無面對者上章亦聽

三月戶部尚書孫鐸即中李仲略國子監蔡酒趙忱始轉對香閣

五月朔以早避正殿命奏事於泰和殿 泰和五年十

一月戊戌大雪免朝參

宣宗貞祐二年正月朔以邊事未息詔免朝賀 三年

正月曲宴羣臣宋使定文武五品以上侍坐員遂為定制十二月以軍事免樞密院官朝拜壬辰詔免元日朝賀癸丑又諭宣徽院免元日親王公主進酒

時禮官奏正旦宋遣使來賀不宜輟朝不舉樂服色如常儀至明年正月丁卯諭御史臺曰今旦視朝百官既拜之後始聞開封府報衙聲四方多故之秋弛慢如此可乎中丞福興素號謹於官事當一詰之

興定三年四月詔朝臣四日一奏事

先是貞祐三年四月權叅知政事德升言舊制夏至後免朝四日一奏事帝曰此在平時可也方今多故勿以朕勞遂云當免但國事無廢則善矣至是年以時暑乃詔朝臣如此

哀宗正大元年正月尊宣宗皇后及元妃皆為皇太后

百官入賀於隆德殿

皇后溫都氏宮曰仁聖元妃溫都氏宮曰慈聖

天興元

年四月百官初起居於隆德殿前

國初即位儀

太祖收國元年正月壬申朔諸路官民耆老畢會議
創新儀奉帝即皇帝位鄂蘭哈瑪爾宗翰乃陳耕具
祝以闢土養民之意復以良馬九隊隊九匹別為色
并介冑弓矢矛劍奉上國號大金建元收國天會元
年九月丙辰太宗即位己未告祀天地丙寅大赦改
元

受尊號儀

熙宗皇統元年正月二日太師宗幹率百僚上表請

上尊號凡三請詔允七日遣上京留守與告天地社稷析津尹宗強告太廟十日帝服袞冕御元和殿宗幹率百僚恭奉冊禮冊文云云臣等謹奉玉冊玉寶上尊號曰崇天體道欽明文武聖德皇帝是日皇帝改服通天冠宴二品以上官及高麗夏國使十二日恭謝祖廟還御宣和門大赦改元 世宗大定七年恭上尊號前三日遣使告奏天地宗廟社稷前二日諸司停奏刑罰文字百官習儀於大安殿庭兵部率

其屬設黃麾仗於大安殿門之內外宣徽院率儀鸞
司於前一日設受御冊寶壇於大安殿中間又設御
榻於壇上又設冊寶幄次於大安殿門外及設皇太
子幄次於殿東廊又設羣官次於大安門外大樂令
與協律郎前一日設宮縣於殿庭又設登歌樂架於
殿上立舞表於殿下符寶郎即其日俟文武羣官入
奉八寶置於御座左右候上寶冊訖復舁寶還所司
即其日質明奉冊太尉奉寶司徒讀冊中書令讀寶

侍中以次應行事官並集於尚書省俟冊寶興乘馬
奉迎冊寶至應天門下馬由正門步導入至大安殿
門外置冊寶於幄次舁冊寶牀弩手人等分立於左
右文武羣官並朝服入次攝太常卿與大樂令帥工
人入就位協律郎各就舉麾位舁冊寶案官由西偏
門先入置案於殿東西間褥位置訖各退於西階冊
寶位後捧冊官捧寶官舁冊匣官舁寶盞官由西偏
門先入至殿西階下冊寶褥位之西東向立俟闕門

報通事舍人引攝侍中版奏中嚴訖典儀贊者各就位
閣門官引文武百僚分左右入於殿階下磚道之
東西相向立符寶郎奉八寶由西偏門分入升置殿
上東西間相向訖分左右立於寶後通事舍人引攝
侍中版奏外辦扇合帝服袞冕以出曲直華蓋侍衛
警蹕如常儀殿上鳴鞭訖殿下亦鳴鞭協律郎跪俯
伏興舉麾工鼓祝奏乾寧之曲帝出自東房即座儀
使副添香爐烟升扇開簾捲協律郎偃麾戛鼓樂止

太常博士通事舍人自冊寶幄次分引冊太常卿前
導吏部侍郎押冊而行奉冊太尉讀冊中書令舉冊
官於冊後以次從之次太常博士通事舍人二員分
引寶禮部侍郎押寶而行奉寶司徒讀寶侍中舉寶
官於寶後以次從之由正門入宮縣奏歸美揚功之
曲太常卿於冊牀前導至第一墀香案南籍冊寶褥
位上少置太常卿與衆冊寶官退於冊寶稍西東向
立博士舍人立於其後舁冊寶牀弩手織子官等又

於其後皆東向太尉司徒中書令侍中皆於冊後面
北以次立吏部侍郎禮部侍郎次立於其後立定樂
止閣門舍人分引東西兩班羣官合班轉北向立中
間少留班路俟立定太常博士通事舍人四員分引
太尉司徒中書令侍中吏部禮部侍郎以次各復本
班訖博士舍人退以俟初引時樂奏歸美揚功之曲
至位立定樂止典儀曰拜贊者承傳太尉以下在位
官皆舞蹈五拜班首出班起居訖又贊再拜如朝會

常儀太常博士通事舍人四員再引太尉司徒中書
令侍中吏禮侍郎復進至冊寶所稍南立定舁冊寶
牀弩手織子官並進前舉冊寶牀興太常博士通事
舍人二員分引冊太常卿前導吏部侍郎押冊而行
奉冊太尉讀冊中書令舉冊官於冊後以次從之冊
初行樂奏肅寧之曲次通事舍人太常博士又二員
分引寶禮部侍郎押寶而行奉寶司徒讀寶侍中舉
寶官於寶後以次從之詣西階下至冊寶褥位少置

冊北
寶南

樂止舁冊寶牀弩手織子官等退於後稍西東
向立捧冊官與舁冊官並進前取冊匣升太常博士
通事舍人分引冊太常卿側身導冊先升奉冊太尉
讀冊中書令舉冊官捧冊官於冊後以次從升冊初
行樂奏肅寧之曲進至殿上博士舍人分左右於前
楹立以俟讀冊中書令於欄子外前楹稍西立以俟
舉冊官捧冊官立於其後奉冊太尉從升至禱位搢
笏少前跪置訖執笏俯伏興樂止退於前楹稍西立

以俟太常博士立於後太常卿少退東向立舁冊官立於其後皆東向捧冊官先入舉冊官次入讀冊中書令又次入捧冊官四員皆搯笏雙跪捧舉冊官二員亦搯笏兩邊單跪對舉中書令執笏進跪稱中書令臣某讀冊讀訖俯伏興中書令俟冊興先退通事舍人引降自東階復本班訖太常卿降復寶牀前舁冊官並進與捧冊官等取冊匣興置於殿東間褥位案上西向捧舉冊官等降自東階還本班舁冊官亦

退太常博士引奉冊太尉降自西階東向立以俟次
捧寶官與舁寶官俟讀冊中書令讀訖出並進前取
寶盞升太常博士通事舍人分引寶太常卿側身導
寶先升奉寶司徒讀寶侍中舉寶官捧寶官於寶後
以次從升寶初行樂奏肅寧之曲進至殿上博士舍
人俱退不升並於前楹稍西立俟讀寶侍中於欄子
外前楹間稍西立以俟舉寶官捧寶官立於其後奉
寶司徒從升至褥位搢笏少前跪置訖執笏俯伏興

樂止司徒退於前楹西立以俟太常卿少退東向立
舁冊官立於其後皆東向捧寶官先入舉寶官次入
讀寶侍中又次入捧寶官四員皆搢笏雙跪捧舉寶
官二員亦搢笏兩邊單跪對舉侍中執笏進跪稱侍
中臣某讀寶讀訖俯伏興侍中俟寶興先退通事舍
人引降自西階復本班訖舁寶官進前與捧寶舉寶
等官取寶盞興置於殿之西間褥位案上東向捧寶
舉寶官等與太常卿俱降自西階及吏部侍郎皆復

本班昇寶官亦退太常博士引奉寶司徒次奉冊太尉東向立定博士舍人贊引太尉司徒進詣第一墀香案南褥位立定博士舍人稍退曲儀曰拜贊者承傳在位官皆再拜訖博士舍人二員引太尉詣東階升宮縣奏純臣享上之曲至階止閤門使二員引太尉進至前立定樂止閤門使揖贊太尉拜跪賀殿下閤門揖百僚躬身太尉稱文武百僚具官臣等言致賀詞云云俯伏興退至階上博士舍人分引太尉降

自東階初降宮縣作肅寧之曲復香案南褥位立定
樂止博士舍人少退典儀曰拜贊者承傳太尉司徒
及在位羣官俱再拜舞蹈三稱萬歲又再拜訖通事
舍人引攝侍中升自東階進詣前楹間躬承旨退臨
階西向稱有制典儀曰拜贊者承傳太尉司徒及在
位羣官俱再拜躬身宣詞云云宣訖通事舍人引侍
中還位典儀曰拜贊者承傳階上下應在位羣官俱
再拜舞蹈三稱萬歲又再拜訖博士舍人分引太尉

司徒就百僚位初引宮縣作肅寧之曲至位立定樂止閣門舍人分引應北面位羣官各分班東西相向立定通事舍人引攝侍中升自東階當前楹間跪奏禮畢俯伏興引降還位扇合簾降協律郎俯伏興舉麾工鼓祝奏乾寧之曲帝降坐入自東房還後閣進膳侍衛警蹕如儀扇開樂止捧冊官率舁冊床人捧寶官率舁寶牀人皆升殿取匣盃盞蓋訖置於牀前引進司官前導通事舍人贊引詣東上閣門上進通事

舍人分引文武百僚等以次出歸幕次賜食以俟上
壽上册寶禮畢有司供辨御牀及與宴羣臣位並如
曲宴儀攝太常卿與大樂令帥工人入并協律郎各
就舉塵位俟舍人報通事舍人引三師以下文武百
僚親王宗室等分左右入至殿階下稍南東西相向
立通事舍人先引攝侍中版奏中嚴少頃又奏外辨
扇合鳴鞭協律郎跪俯伏興工鼓祝官縣奏乾寧之
曲帝服通天冠絳紗袍即座簾捲內侍贊扇開殿上

下鳴鞭戛鼓樂止儀使副等添香爐烟升通事舍人
引班首以下合班樂奏肅寧之曲至北向位重行立
定中間少留班路通事舍人引攝侍中詣東階升至
殿上少立閣門舍人引禮部尚書出班前北向俯伏
跪奏稱禮部尚書臣某言請允羣臣上壽俯伏興躬
身通事舍人引攝侍中少退舍人贊禮部尚書再拜
訖贊祇候復本班內侍局進御牀入次良醞令於殿
下橫街南酌酒訖典儀曰拜贊者承傳在位官皆再

拜隨拜三稱萬歲訖平立太常博士通事舍人分引
攝上公由東階升初升宮縣奏肅寧之曲殿上舍人
少退二閣使揖上公進至進酒褥位樂止宣徽使以
爵授上公上公措笏受爵詣榻前跪進受爵訖上公
執盤授宣徽使訖二閣使揖上公入欄子內贊拜跪
殿下閣門揖百僚皆躬身通事舍人揖攝侍中進詣
前楹間躬承旨退臨階西向稱有制典儀曰拜贊者
承傳上公及在位羣官皆再拜隨拜三稱萬歲訖躬

身宣曰得公等壽酒與公等內外同慶閣門舍人贊
宣諭訖上公與百僚皆舞蹈五拜訖閣門舍人引百
僚分班東西序北向立博士舍人再引上公自東階
升宮縣奏肅寧之曲至進酒褥位樂止上公搢笏宣
徽使授上公盤上公詣欄子內褥位跪舉酒宮縣奏
景命萬年之曲飲訖樂止上公進受虛爵訖復褥位
以爵授宣徽使訖二閣使揖上公退內侍局舁御牀
出博士舍人並進前分引降自東階宮縣作肅寧之

曲閣門舍人分引東西兩班隨上公俱復北向位立
定樂止典儀曰拜贊者承傳在位官皆再拜三稱萬
歲訖平立殿上通事舍人揖攝侍中進詣前楹間躬
承旨退臨階西向閣門官先揖百僚躬身侍中稱有
制典儀曰拜贊者承傳在位官皆再拜訖躬身宣曰
延王公等升殿典儀曰拜贊者承傳在位官皆再拜
訖搢笏舞蹈又再拜訖太常博士通事舍人引王公
以下合赴宴羣官分左右升殿不與宴羣官分左右

捲班出宮縣奏肅寧之曲百僚至殿上座後立樂止
內侍局進御牀入依尋常宴會再進第一爵酒登歌
奏聖德昭明之曲飲訖樂止執事者行羣官酒宮縣
作肅寧之曲文舞入觴行一周樂止尚食局進食執
事者設羣官食宮縣奏保大定功之舞三成止出又
進第二爵酒登歌奏天贊堯齡之曲飲訖樂止執事
者行羣官酒宮縣作肅寧之曲武舞入觴行一周樂
止尚食局進食執事者設羣官食宮縣奏萬國來同

之舞三成止出又進第三爵酒登歌奏慶雲之曲飲
訖樂止執事者行羣官酒宮縣作肅寧之曲觴行一
周樂止尚食局進食執事者設羣官食宮縣奏肅寧
之曲食畢樂止閣門官分揖侍宴羣官起立於席後
通事舍人引揖侍中詣榻前俯伏興跪奏侍中臣某
言禮畢俯伏興閣門舍人分引羣官俱降東西階內
侍局舁御牀出宮縣作肅寧之曲至北向位立定樂
止典儀曰拜贊者承傳在位官皆再拜訖搢笏舞蹈

人再拜訖再分班東西序立扇合簾降殿上下鳴鞭
協律郎俯伏跪舉麾興工鼓祝奏乾寧之曲帝降座
入自東房還後閣侍衛如前儀內侍贊扇開夏殿樂
止通事舍人引攝侍中版奏解嚴所司承旨放仗在
位羣官皆再拜以次出

元旦聖誕上壽儀

皇帝升御座鳴鞭報時畢殿前班小起居各復侍立
位舍人引皇太子并臣僚使客合班入至丹墀舞蹈

五拜平立閣使奏諸道表目皇太子以下皆再拜引
皇太子升殿褥位搢笏捧盞盤進酒皇帝受置於案
皇太子退復褥位轉盞盞與執事者出笏二閣使齊
揖入欄子內拜跪致詞云元正啟祚品物咸新恭惟
皇帝陛下與天同休若聖節即云萬春令節謹上壽
卮伏願皇帝陛下萬歲萬歲萬歲祝畢拜興復褥
位同殿下羣僚皆再拜宣徽使稱有制在位皆再拜
宣答曰履新上壽與卿等內外同慶聖節則曰得卿

壽酒與卿等內外同慶詞畢舞蹈五拜齊立皇太子
措笏執盤臣僚分班教坊奏樂皇帝舉酒殿上下侍
立臣僚皆再拜皇太子受虛盞退立褥位轉盤與執
事者出笏左下殿樂止合班在位臣僚皆再拜分引
與宴官上殿次引宋國人從至丹墀再拜不出班奏
聖躬萬福再拜唱有敕賜酒食又再拜各祇候平立
引左廊立次引高麗夏人從如上儀畢分引左右廊
立御果牀入進酒皇帝飲則坐宴侍立臣僚皆再拜

進酒官接盞還位坐宴官再拜復坐行酒傳宣立飲
訖再拜坐次從人再拜坐三盞致語揖臣使并從人
立誦口號畢坐宴侍立官皆再拜坐次從人再拜坐
食入七盞曲將終揖從人立再拜畢引出聞曲時揖
臣使起再拜下殿果牀出至丹墀合班謝宴舞蹈五

拜各祇候分引出

大定六年正月帝御大安殿受皇太子以下百官及外國使賀賜宴

文武五品以上侍生者有定員為常制十七年詔以皇族袒免以上親雖無官爵封邑若與宴當有班次禮官言按唐典皇家周親視三品大功親小功尊屬視四品小功親總麻尊屬視五品總麻袒免以上視

六品帝令以
此制為班次

朝叅常朝儀

凡朔望朝叅日百官卯時至幕次皇帝辰刻視朝供
御弩手緄子直於殿門外分兩面排立司辰入殿報
時畢皇帝御殿坐鳴鞭閣門報班齊執擎儀物內侍
分降殿階兩傍南面立宿衛官自都點檢至左右親
衛祇應官自宣徽閣門祇候先兩拜班首少離位奏
聖躬萬福兩拜弩手緄子先於殿門外東西向排立

俟奏聖躬萬福時即就位北面山呼聲喏起居畢即相向對立擎御繳直立左班內侍上都點檢以次升殿副點檢在少南東西相向立左右衛在殿下東西相向立閣門乃引親王班贊班首名以下再拜訖班首少離位奏聖躬萬福歸位再拜畢先退次引文武百僚班首以下應合朝叅官并府運六品以上官皆左入至丹墀之東西向鞠躬畢閣門通唱復引至丹墀閣門贊班首名以下起居舞蹈五拜又再拜畢領

省宰執升殿奏事殿中侍御史對立於左右衛將軍
之北少前修起居東西對立於殿欄子內副階下餘
退右出初帝就坐置寶匣於殿階之上東南角後定
制師傅起居畢御案始東入置定捧案內侍東西分
下侍殿隅直日主寶捧寶當殿叩欄奏封全符寶郎
及當監印郎中各一員監令史用印訖主寶吏封授
主寶俟奏事畢進封訖內侍徹案若常朝則親王班
退引七品以上職事官分左右班入丹墀再拜班首

少前起居畢復位再拜宰執升殿餘官分班退

熙宗天眷

二年五月詳定常朝及朔望儀准前代制以朔日六日十一日十五日二十一日二十六日為六叅日後又定制以朔望日為朝叅餘日為常朝世宗大定二年五月命臺臣定朝叅禮自來朝叅除殿前班外若遇朔望自七品以上職事官皆赴其餘朝日五品以上職事官得赴六品以下止於本司局治事如左右司員外郎侍御史記注院等官職雖不係五品亦赴朝叅若拜詔則但有職事并七品以上散官皆赴朝叅吏員令譯史通事檢法各於本局待官員朝退赴局簽押文字不得於宮內署押七品以下流外職遇朝日亦不合入宮如左右司都事有須合取奏事乃聽入宮七品以上職事官如遇使客朝辭見日依朔望日皆赴若元日聖節拜詔車駕出獵送迎詣祖廟燒飯但有職事并七品以上散官皆赴凡親王宗室

已命官者年十六以上皆隨班起居五年右諫議大夫伊喇字敬言明安穆昆不得與州鎮官隨班入見非軍民一體之意帝是其言責宣徽院令隨班入見凡班首遇朝參有故不赴以次押班凡五品以上及侍御史尚書諸司郎中太常丞翰林修撰起居注殿中侍御史補闕拾遺赴召或假一月以上若除官出使之類皆通班入見辭謝除官於殿門外見謝班皆舞蹈七拜辭班四拜門見謝辭並再拜

金史黃久約傳曰世宗時左諫議大夫黃久約侍朝故事宰相奏事則近臣退避久約欲趨出世宗止之自是諫臣不避以為常

肆赦儀

前期宣徽院使率其屬陳設應天門之內外設御座於應天門上又設更衣御幄於大安殿門內外稍東南向階門使設捧制書箱案於御座之左少府監設雞竿於樓下之左竿上置大盤盤中置金雞雞口啣絳幡幡上金書大赦天下四字卷而啣之盤四面近邊安四大鐵環盤底四面近邊懸四大朱索以備四伎人攀緣又設捧制書木鶴仙人一以紅繩貫之引以輓轆置於御前欄子上又設捧鶴畫臺於樓下正

中臺以弩手四人對舉大樂署設宮縣於樓下又設鼓於宮縣之左稍北東向兵部立黃麾仗於門外刑部御史臺大興府以囚徒集於左仗外御史臺閣門司設文武百官位於樓下東西相向又設典儀位於門下稍東西向宣徽院設承受制書案於畫臺之前又設皇太子侍立褥位於門下稍東南向又設皇太子致賀褥位於百官班前又設協律郎位於樓上前楹稍東西向尚書省委所司設制書位於百官班之

北稍東西向司天臺雞唱生於東闕樓之上尚衣局
備皇帝常服如常日視朝之服尚輦設輦於更衣御
幄之前躬謝禮畢皇帝乘金輅入應天門至幄次前
侍中俯伏跪奏請降輅入幄俯伏興皇帝降輅入幄
簾降少頃侍中奏中嚴又少頃俟典儀贊引皇太子
就門下侍立位通事舍人引羣官就門下分班相向
立侍中奏外辦皇帝服常朝服尚輦進輦侍中奏請
升輦繼扇侍衛如常儀由左翔龍門踏道升應天門

至御座東侍中奏請降輦升座宮縣樂作所司索扇

五十柄

扇合皇帝臨軒即御座樓下鳴鞭簾捲扇開執

御緞者張於軒前以障日樂止東上閣門使捧制書

置於箱閣門舍人二員從以俟引繩降木鶴仙人通

事舍人引文武羣官合班北向立宮縣樂作凡分班

合班則樂作立定即止典儀曰再拜在位官皆再拜

訖分班相向立侍中詣御座前承旨退稍前南向宣

曰奉敕樹金雞通事舍人於門下稍前東向宣曰奉

敕樹金雞復位金雞初立大樂署擊鼓樹訖鼓止竿
木伎人四人緣繩爭上竿取雞所啣絳幅展示訖三
呼萬歲通事舍人引文武羣官合班北向立樓上乘
鶴仙人捧制書循繩而下至畫臺閣使奉承置於案
閣門舍人四員舉案又二員對捧制書閣使引至班
前西向稱有制典儀曰拜在位官皆再拜訖以制書
授尚書省稍前搢笏跪受訖以付右司官右司官搢
笏跪受訖長官出笏俯伏興退復位右司官捧制書

詣宣制位都事對捧右司官宣讀至咸赦除之所司
率獄吏引罪人詣班南北向躬稱脫枷訖三呼萬歲
以罪人過右司官宣制訖西向以制書授刑部官跪
受訖以制書加於笏上退以付其屬歸本班典儀曰
拜在位官皆再拜舞蹈又再拜典儀贊引皇太子至
班前褥位立定典儀曰拜皇太子以下羣官皆再拜
典儀引皇太子稍前俯伏跪致詞俯伏興典儀曰再
拜皇太子以下羣官皆再拜搢笏舞蹈又再拜侍中

於御座前承旨退臨軒宣曰有制典儀曰再拜皇太子以下羣官皆再拜侍中宣答宣訖歸侍位典儀曰再拜皇太子以下羣官皆再拜揖笏舞蹈又再拜訖典儀贊引皇太子至門下褥位通事舍人引羣官分班相向立侍中詣御座前俯伏跪奏禮畢俯伏興退復位所司索扇官縣樂作扇合簾降皇帝降座樂止樓下鳴鞭皇帝乘輦還內繖扇侍衛如常儀侍中奏解嚴通事舍人承敕羣官各還次將士各還本所

大定

七年正月十一日上尊冊禮畢
十四日應天門頒赦其儀如此

臣下拜赦詔儀

宣赦日於應天門外設香案及設香輿於案前又於
東側設卓子自皇太子宰臣以下序班定閣門官於
箱內捧赦書出門置於案閣門官案東立南向稱有
敕贊皇太子宰臣百僚再拜皇太子少前上香訖復
位皆再拜閣門官取赦書授尚書省都事都事跪受
及尚書省令史二人齊捧同升於卓子讀在位官皆

跪聽讀訖赦書置於案都事復位皇太子宰官百僚
以下再拜搢笏舞蹈執笏俯伏興再拜拱衛直以下

三稱萬歲訖退

其降諸書禮亦准
此惟不稱萬歲

皇太子生日正旦受賀儀

皇太子生日公服左上露臺欄子外先再拜二閣使
齊搢入欄子內拜跪祝畢就拜興復位再拜又再拜
接臺進酒退跪候飲畢接盞復位轉臺與執事者再
拜宣徽使以酒進皇帝親賜酒接盞稍退跪飲畢宣

徽使接盞復位再拜復揖入欄子內跪搢笏受賜物
畢出笏興復位再拜退更衣入殿稍東西向立皇妃
等進勸生日酒皇太子跪皇妃等亦跪飲畢各再拜
羣臣致賀則其日質明皆公服集於門外少詹事奏
請內嚴又奏外備典儀引升座文武宮臣入就庭下
重行北向立典儀曰再拜在位官皆再拜班首稍前
跪奏元正首祚生日則云慶誕令辰伏惟皇太子殿
下福壽千秋賀畢復位典儀曰再拜官官皆再拜坐

受分東西序立次引東宮三師於殿上三少於殿柱
外北向東上立皇太子詣南向褥位典儀曰再拜師
少皆再拜班首同前稱賀復位執事者酌酒一卮班
首奉進樂作飲訖樂止回勸師少畢各復位典儀贊
師少再拜皇太子答拜師少出皇太子就坐次引親
王入欄子內一品宗室於欄子外餘宗室序班庭下
拜致賀進酒如上儀皇太子答拜畢就坐復引隨朝
三師三公宰執於殿上三品以上職事官於露階上

四品以下於庭下北向每等重行以東為上立皇太子詣禩位典儀曰再拜上下皆再拜畢班首少前致賀復位執事者酌酒一卮班首奉進樂作飲畢樂止如有進獻如常儀回勸三公三師餘殿上羣官則令執事者以盤行酒飲畢典儀曰再拜上下皆再拜乃答拜引羣官以次出少詹事跪奏禮畢自是歲賀為

定制

世宗大定二年命有司議親王百官及妃主命婦見皇太子禮有司按唐宋舊儀擬親王宗室

賀皇太子依冊畢受賀禮然唐禮元正復有降階見叔伯答羣官再拜之文又無妃主命婦見太子之禮

稽古今文凡應致恭之官相見或貴賤殊隔或長幼親戚任從私禮自今若在東宮候皇太子便服則當從私禮接見若三師以下遇皇太子誕日在御前則候皇太子先進酒畢百官望皇太子再拜班首跪進酒又再拜若賜酒即當殿跪飲畢又再拜以為定制命頒行之十二月晦太子奏狀曰按禮文親王并一品宗室皆北面拜伏臣但答揖而已雖曰尊宗子而在長幼悖敬之間誠所未安當時遽蒙頒降未獲謙讓明日元正有司將舉此禮伏望聖慈許臣答拜庶敷親親友愛之義帝從之命尚書省頒下所司

皇太子與百官相見儀

三師三公欄子內北向躬揖班首稍前問候皇太子離位稍前正南立答揖宰執及一品職事官扣欄子

北向躬揖答揖如前二品職事官欄子外向南躬揖
皇太子起揖三品職事官露階稍南躬揖皇太子坐
揖四品以下職事官庭下躬揖跪問候皇太子坐受
太子太師太傅太保與隨朝三師同東宮三少與隨
朝二品同詹事以下並在庭下面北每品重行以東

為上再拜稍前問候又再拜皇太子坐受

大定二年所定也七

年定制皇太子赴朝許與親王宰執相見餘官宗室
並迴避後亦許與樞密使副御史大夫判宗正東宮
三師相見九年定制凡皇太子出於都門三里外設
褥位三公宰執以下公服重行立皇太子便服三公

宰執以下鞠躬班首致辭云青宮萬福再拜皇太子答拜退迎送皆同

金史禮志章帝承安五年五月帝諭有司曰女直漢人拜數可以相從者酌中議之禮官奏周官九拜一曰稽首拜中至重臣拜君之禮也乞自今凡公服則用漢拜若便服則各用本俗之拜主事陳松曰本朝拜禮其來久矣乃便服之拜也可令公服則朝拜便服則用本朝拜平章政事張萬公謂拜禮各便所習不須改也司空完顏襄曰今諸人

衽髮皆從本朝之制宜從本朝拜禮松言是也乃命公裳則朝拜諸色人便服則皆從本朝拜

元太祖元年帝大會諸王羣臣建九旂白旗即皇帝位於鄂諾河之源

是歲實金之泰和六年也

太宗元年八月即皇帝位始立朝儀

皇族尊屬皆拜

臣等謹按陶宗儀輟耕錄謂帝即位時耶律楚材

為中書令定策立儀禮皇族尊長皆令就班列拜
尊長之有拜禮自此始今以列傳考之耶律楚材
於二年拜中書令方定儀制時特告親王察罕台
曰王雖兄位則臣也禮當拜王拜則莫敢不拜王
乃率皇族及臣僚俱拜帳下焉

世祖至元八年三月敕元正聖節朝會凡百官表章外
國進獻使臣陛見朝辭禮儀皆隸侍儀司八月己未聖
誕節初立內外仗及雲和署樂位十一月劉秉忠及王

盤圖克坦公履等言元正朝會聖節詔赦及百官宣赦具公服迎拜行禮從之

元史禮志曰先是至元六年正月太保劉秉忠大司農博囉奉旨命趙秉溫史杠訪前代知禮儀者肄習朝儀既而秉忠奏曰一人習之雖知之莫能行也得旨許用十人遂徵儒生周鐸劉允中尚文岳忱關思義侯佑賢蕭琬徐汝嘉從亡金故老烏庫哩居貞完顏復昭完顏從愈葛從亮于伯儀及

國子祭酒許衡太常卿徐世隆稽諸古典參以時
宜緣情定制而肄習之百日而畢秉忠及翰林太
常奏曰今朝儀既定請備執禮員帝命丞相安圖
大司農博囉擇蒙古宿衛士可習容止者二百餘
人肄之期月七年二月奏以丙子觀禮前期一日
布綿叢於金帳殿前帝及皇后臨觀於露階禮文
樂節悉無遺失十一月秉忠等奏請建官典朝儀
帝命與尚書省論定以聞八年二月立侍儀司以

呼圖克約蘇額森乃為左右侍儀奉御趙秉溫為
禮部侍郎兼侍儀司事周鐸劉允中為左右侍儀
使尚文岳忱為左右直侍儀事闕思義侯佑賢為
左右侍儀副使蕭琬徐汝嘉為僉左右侍儀事烏
庫哩居貞為承奉班都知完顏復昭為引進副使
葛從亮為侍儀署令于伯儀為尚衣局大使四月
侍儀司奏請製內外仗如歷代故事從之七月內
外仗成遇八月帝生日號曰天壽聖節用朝儀自

此始

輟耕錄曰至元初尚未遑興建宮闕凡遇稱賀則
臣庶皆集帳殿前無尊卑貴賤之辨執法官厭其
喧雜揮仗擊逐之去而復來者數次翰林承旨王
磐時兼太常卿慮將貽笑外國奏請立朝儀遂如
其言今考王磐傳嘗上疏曰舊制天子宫門不應
入而入者謂之闌入闌入之罪由第一門至第三
門輕重有差宜令宣徽院籍兩省而下百官姓名

各依班序聽通事舍人傳呼贊引然後進其越次者殿中司糾察定罰不應入而入者準闕入罪庶朝廷之禮漸可整肅於是儀制始定

九年正月定受宣敕官禮儀 十一年正月朔宮闕告

成帝始御正殿受皇太子諸王百官朝賀 十九年八

月聖誕節帝自龍虎臺還宮御正殿受皇太子諸王百

官朝賀 二十一年正月帝御大明殿右丞相和爾果

斯率百官奉玉冊玉寶上尊號諸王百官朝賀如朔旦

儀二十三年正月朔以皇太子故罷朝賀二十九

年正月朔以日食免朝賀

成宗大德二年九月聖誕節受諸王百官賀

時駕幸上都駐蹕實桂之地四年九月駐蹕古策九年駐蹕於壽寧宮受朝賀俱如之

十一年十一月

時武宗已即位

以皇太子受冊禮成御大明殿

受諸王百官朝賀

仁宗延祐七年十一月

時英宗已即位

以親祀太廟禮成御大

明殿受朝賀

泰定帝泰定元年十二月敕內外百官凡行朝賀等禮
雨雪免朝服

文宗至順元年十二月以十月郊社禮成御大明殿受
文武百官朝賀 四年六月

時順帝
己即位

以至順四年為元

統元年中書省言凡朝賀遇雨請便服行禮從之

順帝元統二年十月朔正內外官朝會儀班次一依品
從 至元二年十一月詔特穆爾布哈王府官屬朝賀

班次列於有司之右 六年十一月以親裸大禮慶成
御大明殿受羣臣朝 至正十九年四月帝以天下多
故却天壽節朝賀

禮樂志曰元之有國肇興朔漢朝會燕享之禮多
從本俗太祖即皇帝位始建九旒白旗世祖至元
八年始制朝儀自是皇帝即位元正天壽節及諸
王外國來朝冊立皇后皇太子羣臣上尊號進太
皇太后皇太后冊寶暨郊廟禮成羣臣朝賀皆如

朝會之儀而大享宗親錫宴大臣猶用本俗之禮
為多

臣等謹按元史列傳世宗中統元年監察御史魏
初上疏曰臣聞君猶天也臣猶地也尊卑之禮不
可不肅方今內有太常有史官有起居注以議典
禮記言動外有高麗安南使者入貢以觀中國之
儀昨聞錫宴大臣威儀弗謹非所以尊朝廷正上
下也疏入帝欣納之此殆至元六年制朝儀所自

始歟然順帝時蘇天爵奏曰邇年以來朝儀雖設
版位品秩率越班行均為衣紫從五與正五雜居
共曰服緋七品與六品齊列下至八品九品莫不
皆然夫既踰越班制遂致行列不端因忘肅敬之
心殊失朝儀之禮今後朝賀行禮聽讀詔赦先儘
省部院臺正從二品衙門次諸司局院各驗執事
散官序列正從班次如有踰越品秩差亂位序者
同失儀論以懲不恪語載元典章中此又元統時

所以復正朝會班次耳

即位受朝儀

前期三日習儀於萬安寺前二日陳設於殿廷前一
日設宣詔位於闕前至期大昕侍儀使引導從護尉
各服其服至皇太子寢閣前捧牙牌跪報外辦內侍
傳旨曰可侍儀使俯伏與皇太子出閣侍儀使前導
由崇天門入升大明殿引進使引導從至皇太子妃
閣前跪報外辦內侍出傳旨曰可引進使俯伏與前

導由儀鳳門入俟諸王以國禮扶皇帝登寶位畢鳴

鞭三尚引引點檢以下皆公服入就起居位

起居贊拜如元

正朝儀

兩班點檢宣徽將軍宿直尚廐管旗各恭事俟

后妃諸王駙馬以次賀獻禮畢叅議中書省事四人

以篚奉詔書由殿左門入至御榻前叅議中書省事

跪奏詔文俯伏興以詔授典瑞使押寶畢置於篚對

舉由正門出樂作置闕前以詔置於案文武百僚各

公服就位北向立侍儀稱有制宣贊唱拜通贊贊鞠

躬拜興拜興平身班首稍前典引班首至香案前
通贊贊跪在位官皆跪司香贊搯笏通贊贊上香上
香三上香出笏就拜興復位宣贊唱拜通贊贊鞠躬
拜興拜興平身侍儀使以詔授左司郎中郎中跪受
同譯使稍西升木榻東向宣讀通贊贊在位官皆跪
讀詔先以國語宣讀隨以漢語譯之讀畢降榻以詔
授侍儀使侍儀使置於案通贊贊就拜興拜興拜興
搯笏鞠躬三舞蹈跪左膝三叩頭山呼山呼再山呼

出笏就拜興拜興拜興平立典引引丞相以下皆公

服入起居位

起居拜舞祝頌進酒獻表
賜宴並同元正受朝儀

宴畢鳴鞭三

侍儀使導駕引進使導后入寢殿如來儀次日以詔

頌行

輟耕錄曰大明門在崇天門內大明殿之正門也

七間三門日精門在大明門左月華門在大明門

右皆三間一門大明殿乃登極正旦壽節會朝之

正衙也十一間寢室五間東西夾六間後連香閣

三間中設七寶雲龍御榻白蓋金樓褥並設后位
諸王百僚怯薛官侍宴坐床重立左右

上尊號受朝賀儀

前期二日儀鸞司設大次於大明門外又設進冊案
於殿內御座前之西進寶案於其東設受冊案於御
座上之西受寶案於其東侍儀使設冊案於香案南
寶案又於其南禮儀使位於前冊使副使位於廷中
北面引冊奉冊舉冊讀冊捧冊官位於右引寶奉寶

舉寶讀寶捧寶官位於左以北為上百官自金玉府
迎冊寶奉安中書省如常儀前期一日右丞相率公
卿朝服儀衛音樂導冊寶二案出自中書至闕前控
鶴奠案方輿中道冊使等奉隨入大次內方輿奠案
侍儀使引冊使以下由左門以出百官趨退至期大
昕右丞相以下百官各公服集闕廷儀仗護尉就位
侍儀使禮儀使引導從導皇帝升大明殿引進使引
導從導皇后升殿尚引引殿前班入起居位起居山

呼舞拜畢宣贊唱曰各恭事皇太子諸王后妃公主
以次升殿鳴鞭三侍儀使引冊引寶導冊寶由正門
入樂作奉冊使右丞相率冊官由右門入奉寶使御
史大夫率寶官由左門入至殿下置冊案於香案南
寶案又奠於其南樂止禮儀使引冊使以下就起居
位典引引羣臣入就位通班舍人唱文武百僚具官
臣某以下起居典引贊鞠躬平身引至丹墀拜位宣
贊唱拜通贊贊拜舞蹈山呼如常儀畢承奉班都知

唱奉冊使以下進上冊寶侍儀使引冊使以下進就位樂作掌儀贊奉冊寶官稍前措笏捧冊寶侍儀使前導由中道升正階立宇下俟奉冊使諸冊官由右階躋奉寶使諸寶官由左階躋畢俱由左門入奉冊寶至御榻褥位前冊西寶東樂止掌儀贊捧冊官稍前以冊寶跪置於案出笏就拜興平身復位奉冊使以下皆跪舉冊官興俱至案前跪措笏取冊於匣置於盤對舉讀冊官興俱至案前跪讀冊官稱臣某謹

讀冊讀畢舉冊官納冊於匣興以授典瑞使出笏立於冊案西南典瑞使置於受冊案掌儀贊舉寶官興俱至案前跪播笏取寶於盃對舉讀寶官興俱置案前跪讀寶讀寶官稱臣某謹讀寶讀畢舉寶官納寶於盃興以授典瑞使出笏立於寶案東南典瑞使置於受寶案掌儀贊奉冊使以下皆就拜興平身參議中書省事四人以篚奉詔書由殿左門入至御榻前跪讀詔文如常儀授典瑞使押寶畢置於篚對舉由

正門出至丹墀北置於詔案冊使以下由南東門出
就位聽詔如儀儀鸞使四人舁進冊寶案由左門出
侍儀使引班首由左階躋前行色樂作

按前行色乃指登歌者及

舞童舞女等見下元正受朝儀中

至宇下樂止舞旋至露階立班首

入殿宣徽使奉隨班首跪宣徽使西北向立班首致

詞曰冊寶禮畢願上皇帝皇后萬萬歲壽宣徽使應

曰如所祝樂作通贊唱分班進酒畢班首由南東門
出降階復位樂止通贊唱合班奏進表章禮物贊拜

舞蹈山呼錫宴並如元正之儀

上尊號冊寶凡攝官二百五十有六人奉

冊官四人奉寶官四人捧冊官二人捧寶官二人讀冊官二人讀寶官二人引冊官五人引寶官五人與瑞官三人糾儀官四人殿中侍御史二人監察御史四人閤門使三人清道官四人點試儀衛五人司香四人備顧問七人代禮官三十人拱衛使二人押仗二人方輿一百六十人

元正受朝儀

前期三日習儀於聖壽萬安寺

或大興教寺

前二日陳設

於殿庭至期大昕侍儀使引導從護尉各服其服入至寢殿前捧牙牌跪報外辦內侍入奏出傳制曰可

侍儀俯伏興皇帝出閣升輦鳴鞭三侍儀使并通事
舍人分左右引擎執護尉尉正斧中行導至大明殿
外劈正斧直正門北向立導從倒捲序立惟扇置於
錡侍儀使導駕時引進使同內侍官引宮人擎執導
從入至皇后台捧牙牌跪報外辦內侍入啓出傳
旨曰可引進使俯伏興皇后出閣升輦引進使引導
從導至殿東門外引進使分退押直至堊塗之次引
導從倒捲出俟兩宮升御榻鳴鞭三劈正斧退立於

露階東司晨報時雞唱畢尚引引殿前班皆公服分

左右入日精月華門就起居位相向立通班舍人唱

左右衛上將軍兼殿前都檢點臣某以下起居尚引

唱鞠躬平身引至丹墀拜位知班報班齊宣贊唱拜

通贊贊鞠躬拜興拜興都檢點稍前宣贊報聖躬萬

福通贊贊復位拜興拜興平身搯笏鞠躬三舞蹈跪

左膝三叩頭山呼山呼再三呼

凡傳山呼控鶴呼諫
應和曰萬歲傳再山

呼應曰萬萬
歲後倣此

出笏就拜興拜興拜興平立宣贊唱各

恭事兩班點檢宣徽將軍分左右升殿宿直以下分
立殿前尚廡分立仗南管旗分立大明門南楹俟后
妃諸王駙馬以次賀獻禮畢典引引丞相以下皆公

服入日精月華門就起居位通班唱文武百僚開府

儀同三司錄軍國重事監修國史右丞相

具官
無帶

臣某

以下起居典引贊鞠躬平身引至丹墀拜位知班報
班齊宣贊唱拜通贊贊鞠躬拜興拜興平身搢笏鞠
躬三舞蹈跪左膝三叩頭山呼山呼再山呼出笏就

徽使答曰如所祝丞相俯伏興退詣進酒位尚醞官以觴授丞相丞相搢笏奉觴北面立宣徽使復位前行色降舞旋至露階上教坊奏樂樂舞至第四拍丞相進酒皇帝舉觴宣贊唱殿上下侍立臣僚皆再拜通贊贊鞠躬拜興拜興平身丞相三進酒畢以觴授尚醞官出笏侍儀使雙引自南東門出復位樂止通贊贊合班禮部官押進奏表章禮物二案至橫階下宣禮物舍人進讀禮物目至第二重階俟進讀表章

官等

翰林國史院
屬官一人

至宇下齊跪宣表目舍人先讀中

外百司表目翰林院讀中書省表畢皆俯伏興退降

第一重階下立俟進讀禮物舍人升階至宇下跪讀

禮物目畢俯伏興退同降至橫階隨表章西行至右

樓下侍儀仍頷之禮物東行至左樓下太府受之宣

贊唱拜通贊贊鞠躬拜興平身搯笏鞠躬三舞蹈跪

左膝三叩頭山呼山呼再山呼出笏就拜興拜興拜

興平立僧道者老外國番客以次而賀禮畢大會諸

王宗親駙馬大臣宴饗殿上侍儀使引丞相等升殿
侍宴四品以上賜酒殿上典引引五品以下賜酒於

日精月華二門之下宴畢鳴鞭三侍儀使導駕引進

使導后還寢殿

天壽聖節受朝郊廟禮成受賀俱如此儀凡大宴馬不週一羊雖多必

以獸人所獻之鮮及脯鱗折其數之半預宴之服衣服同制謂之齊遜至元七年進酒儀班首至殿前
褥位立前行進曲尚醞官執空盃自正門出授班首班首播笏執空盃由正門入至御榻前跪俟曲終以
盃授尚醞官出笏祝贊宣徽使曰諾班首俯伏興班首宣徽使由南東門出各復位班首以下舞蹈山呼
五拜百官分拜教坊奏樂尚醞官進酒殿上下侍立臣僚皆再拜三進酒畢班首降至丹墀至元十八年

十二月二十
八日改今儀

輟耕錄曰劈正斧以水蒼玉碾造高二寸有奇廣
半之文藻燦然或云自殷時流傳至今者如天子
登極正旦天壽節御大明殿會朝時則一人執之
立於陛下酒海之前蓋所以正人不正之意又天
子凡宴享一人執酒觴立於右階一人執拍板立
於左階執板者仰揚其聲贊曰鄂拓克執觴者如
其聲和之曰打弼則執板者節一板從而王侯卿

相合坐者坐合立者立於是衆樂皆作然後進酒
詣帝前帝飲畢授觴衆樂皆止則奏曲以飲陪位
之官謂之喝盞蓋襲金舊禮至今不廢

孫承澤春明夢餘錄曰元大朝殿上設漏案香案
酒海殿門外中道設褥位丹陛中道設鳴鞭丹墀
中道設香案又設表案禮物案中道南東西設樂
位設內黃麾立仗設外牙門立仗酒海之前一人
手執玉鉞立於陛下鉞乃殷時之物長三寸有奇

廣半之通體花紋宋藏宣和殿中為金所得後歸元以為大寶

臣等謹按元典章載馬祖常曰百官朝見奏事古有常儀今國家有天下百年典章文物屢復古制惟朝儀之典不講實為闕遺且夫羣臣奏對之際御史執簡史官執筆縉紳佩玉儼然左右則雖有懷奸利乞官賞者亦不敢公出諸口如蒙聞奏命中書省會集文翰衙門官員究講參酌古今之宜

或三日二日一常朝則治道昭明生民之福也今
考列傳祖常時為監察御史請御正衙立朝儀所
言如此然據春明夢餘錄謂元世祖至元十一年
正旦始御大明殿受朝賀及後天壽節皆行朝賀
禮每日則宰執入延春閣及別殿奏事而已是以
元史不載常朝朝參儀雖馬祖常有三日二日常
朝之請而未聞見諸施行則知終元之世蓋無所
謂常朝禮也

欽定續文獻通考卷八十七